

四庫全書

集部

欽定四庫全書

集部

熊峯集

目錄
卷一

詳校官監察御史_臣曹坦

中書_臣劉源溥覆勘

總校官進士_臣朱鈐

校對官主事_臣陳文樞

謄錄監生_臣施華

欽定四庫全書

集部六

熊峯集目錄

別集類五
明

卷一

五言古

卷二

七言古

卷三

五言律

卷四

七言律

五言排律

五言絕句

七言絕句

卷五

賦

表

疏

碑文

記

傳

文

說

卷六

序

銘

墓誌銘

墓表

卷七

四言古

五言古

卷八

七言古

卷九

五言律

七言律

五言排律

五言絕句

七言絕句

六言絕句

卷十

賦

記

傳

說

序

贊

銘

墓誌銘

墓表

臣等謹案熊峯集十卷明石珪撰珪字邦彥
藁城人成化丁未進士官至文淵閣大學士
謚文隱改謚文介事跡具明史本傳珪出李
東陽之門東陽每稱後進可託以柄斯文者
惟珪一人皇甫汸嘗刪定其集為四卷歲久
板佚

國朝康熙丁未餘姚孫光焄為藁城知縣得別

集遺稿於其家為合而重刊之嗣間真定梁清標家有其全稿乃購得續刊共為十卷此本自一卷至四卷為詩五卷六卷為文七卷至九卷又為詩十卷又為文蓋刊板已定不能依類續入故體例叢脞如是也珪詩文皆平正通達具有茶陵之體故東陽特許之當北地信陽駸駸代興之日而珪獨堅守師說屢典文衡皆力斥浮誇使粹然一出於正雖

才學皆遜東陽而湜湜持正不趨時好亦可
謂堅立之士矣乾隆四十六年正月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

熊峯集卷一

明 石珪 撰

詩

五言古

送楊提學應寧

蚤聞伯起譽亦欲樞吾衣長風振郊壑雲龍忽分飛仰
止徒高山而勢不能依文章絢圭璧日得窺餘輝臯鳥

倏一舉淵魚遂其肥道合志乃同此意識者稀所以淵
明琴不在弦與徽京國再相逢躡豸有餘威一展疇昔
願清論聆霏霏灑我塵埃襟登之清風磯雖非暮春姿
忽爾吟咏歸何怪公門人器識俱可希公門有青驄行
色動朝暉安能一東芻聊以駐駢駢晨星本易散流雲
亦易微逝彼西北風茲懷良不違

旭日春耕為閩大叅賦

東方白已發壘晦明浩浩不辭荷耒倦穡事貴及早道

逢同心人勞問亦草草共言年穀登百歲可相保

秋日遣興

旭日戒僮夫駕言適東野市朝垢心境廣莫快一寫況
值日疾除秋色尚可假豈徒望封龍巖壑翠堪把近觀
百穀繁一一舍大化我雖宦遊人自是悠悠者忽逢鄰
叟來相歡坐桑下

寄兄舊作

寒空變春雲奔驥逐迅景君看宮前楊忽已露碧影幽

居西牕下感事發深省誰言有為者譬握九仞井盛顏
易消歇此道獨未領空奏郢人吟懷抱殊耿耿吾兄繡
衣使仗鉞指西境清詩賞風流正論崇骨鯁寄言願相
勗共此百歲永

鼓不絕

鄰巷相見語茲農薄收成何緣累旬日簫鼓未絕鳴東
家男已長西家女將行羔雁來問吉雞豚往通名置宴
召賓侶責逋急官征斛粟易百錢入坐恐未盈花顏照

四席典客稽考明布帛身不著妻子徒力耕違俗懼乖
義先王近人情歌管沸兩耳中心悵且驚但見蟻杯綠
不知魴尾頰憑君聽簫鼓中有勞者聲

怨歌行

珠人本中國萬里向海陬結網沈洪波深入鼃鼃湫珊
瑚由寸積驪龍不易求百死冒霜霧累年被淹留舉手
得夜光寶樹照斗牛三獻入漢庭聲名動九州日往歲
亦徂忽生瑕類憂長恐棄道側勤苦不能酬豈惜寒與

飢懼貽重寶羞中夜起長歎淚下如泉流

春日即事

林塘鳴春鳩忽忽過穀雨繁紅多辭柯綠甲半出土魚
欣荷錢青鳥悅石髮古凌雲思高臺對日作獨舞為生
良支離被命孰偃僂悠然東風來兀坐聽杜宇

飲鮑雲瑞莊

城柳初盡處薄靄開空明潦降古洲出千里關寸情斷
岸帶芳草遠樹啼殘鶯釣艇日往還或有羊裘生下馬

對尊筇故人相與傾坐久出歌舞柔風濯長纓落霞酣
野色吟蛩戰秋聲長恐西日下衢路立屏營

夜渡溇沱

西日光已微跨馬出村境唧唧林鳥鳴仰見河漢影南
巡古堤麓地峻行屢警踏軟知近沙野濶夜逾靜誰將
笙歌耳復聽秋蟲啞萬事倏春夢對此山河永驚波噓
斷岸跳梁老魚猛星斗搖長練薄吹搜鬢頰鼓柁歌滄
浪懷人憶千頃遙望城西門熠燿煙火冷

秋夜

涼夜始多夢升沈頃相尋蟋蟀入牀下蕭序已載陰
裳出庭戶河漢清且深華月掛林杪高鴻送哀音百歲
豈不多半為風雨侵嗟彼蝸角名煩此孤鶴心流水激
古洲高山出遠岑子期果難逢獨卧枕素琴

蚤起

城陰苦寒沍積雪冬未消日夕人馬馳流塵亂瓊瑤抱
志諒猶潔凌風詎能飄徒然漾空月皎皎射牕綃野客

官大都雞鳴候晨朝
卧聞車轂聲軋啞上干霄
起披黑貂裘啓明正
搖搖踈踊不能寐
曳珮趨午橋

寄羅汝實

寒齋坐無事對此春晝雨
雙鴻自南來流韻落庭廡
起尋故人書別緒那可數
春草南園綠秋月西林吐
歌詩每達夜笑喙曾過午
雲龍忽乖張感物益悽楚
何時倒清尊共醉恒川澗

雨中寄白文明

開書復開書雲影照顏色東風昨夜至渠柳柔無力雖
有龍泉劔袖短時拂拭時人競彎弧古道惡弦直聖王
崇舊儒不忍棄一得漫隨東觀班豈有圖南翼經書雖
滿案抱病長憂惻遙見孤雲飛佇立而歎息

新婦詞

醜婦羞見姑終難不上堂鷄鳴理箴帨對鏡著衣裳薰
沐再至三稍覺有容光長跪問起居顧影尚徬徨大人
總家政百務惟德將舉手能績麻出門時採桑辛勤無

日夜歡喜動姑嫜入與諸姑遊諸婦日翱翔愛壁不見
瑕度材或惜長邦家本一致竭力安可忘

章錦衣園餞克温

惜別駐郊坳名園及璀璨朱榮懸弱蔓清樾護修幹載
展夙昔歡頗興萍蓬歎觥繁亂迴波坐逸何泮渙妙舞
出京洛清歌徹雲漢探幽入虎谷躡蹬聳飛翰幾欲凌
長風六極遊汗漫主人愛真景廢榭臨斷岸豈惟示樸
淳正欲知憂患吾儕睹落葉朝聚夕又散當時盛紅顏

幾許髮已換安知垂汗青試聽歌石爛願言保終始慶
雲旦復旦

雜詩

妙舞恒赴節善歌多應弦藝精契至理輪扁非言傳情
矯性始鑿禮煩本日顛所以大觀人遊目無為先豈不
笑與嘖造適意悠然投足得規矩率真外蹄筌庶幾達
聖境併可延天年

雨坐述懷

結髮事竒謀年徂志彌遠雖蒙簪紱榮抱病日長偃興
到偶繙閱吟哦不終卷古來忠與邪往往激褊淺長城
能自壞元惡疇克殄所以樂道人但欲脫軒冕境大意
自舒身安慮長鮮此理本分明不用更輟轉

雜詩

大樸已彫散頰波漫末塗牋詰日紛綸君臣互為諛直
弦忽見絕白壁多掩瑜但聞都俞聲無復咈與吁往往
抗顏色猶稱邁唐虞唐虞不可見烈士始全軀王掾名

癡絕槐里號狂愚安能起臯益重述邦家謨

春出西郭門

芳郊艷春陽百卉待葱蒨念我多悲人如何及遊宴間
鴉墮清淚睹草增春戀豈獨感蓼莪正自哀衣線仰天
恩罔極銜慟髮先變愧彼九臯禽和鳴徹霄漢

擬古

閱世貴知忌骯髒始多僭趾發物已逆意行悔相連苦
抱叔夜僻誰辨箕季賢坦枉固有分直絲寧改弦豈不

悟裸搨賈禍几席前鴻鵠各負志縣方豈成圓出門欲
學步足亂首忽顛何如執堅貞歲晏循固然王道本寬
衍鍤薄世謂良鞞革大始裂筮軌齊已僵雖剔毫末疵
不顧根本傷譬彼几上琴軫急寧久張中行任智敗季
孫以斂亡覆車鑿不遠胡為復周章廟堂宜有樞關闔
道始昌憑誰用楊綰暫為輟絲簧

熊耳峯

封龍山勢壯截崖見熊耳高峙層霄間下聽幾千里威

深貌虎避意拔雷電起乃知天降靈自與凡石異浮嵐
出晴丹淑氣凝夜紫彷彿懸崖旁呵護有神鬼我思漢
三老幽谷訪遺屐人去事亦非荒池但秋水地靈應未
散烈士還繼軌遙遙白雲中何人隱高几

恭睹臨雍釋奠敬述以詩

璧水晨濟瀆石壇花始垂雲開大成殿檜栢鬱歲莖盛
王重孔道裸獻皆親持簫韶切雲漢八佾盈堦墀禮成
進諸生講席命爾師敷陳唐虞理論說義文辭坐久進

珍茗雨露必旁施三氏既榮耀九卿亦華滋東瞻學士
班文采何陸離各斂補衣手默默猶論思斯文日中天
志士正揚眉

送王司徒分韻得五字

在昔稱高士箕山及巢父雖垂千載名吾道固未取君
臣義自重豈得薄圭組惟是勲業成幾微貴先睹二疏
辭漢榮季鷹懷吳土司徒志亦然百世殆同矩辛勤三
十年出身事清主行者必有歸安得長偃僂明山有茅

亭亭南有瓜圃象觀有卷舒理玩月三五始息負重肩
時與荷蓀伍睡足江南春無人報風雨

夜至張秋

日暮出荆門夜行復十里半帆乘順風一篙得春水
燈危檣末餘映徹洲汜遠遠聞犬聲漸喜近井市纜人
相和歌飢渴被驅使恨無濁酒勞畢力共王事

擬古二首

江北好風花江南好魚米北來南去人好謝長江水

其二

風發吾舟停風停吾舟發誰知乘舟人正是觀風客

過沛望歌風臺

三王久不作溥風變縱橫兵戈入戰國者宿填秦坑天
賜赤帝子龍泉定升平豈獨體貌異聖度疇與京功成
歸故里慷慨道平生意氣自雄俊歌詞亦崢嶸至今千
載下聞者心膽明是宜冠庶物直與商周并帝子乘龍
升故臺未全平臺下春草綠時鳥間關鳴猛士安在哉

四海復永清仰見雲飛揚
逝風有餘情

送王尚書德輝還餘姚五首

杳杳稽山青茫茫舜江白
意倦行且休身存歲寧迫
唐虞世已遠孔孟道未塞
長嘯凌秋空黃花正盈陌

其二

吾行何所求青山映華髮
板輿傍春花清波濺仙鞵
功名一炊黍人世幾明月
歷覽千萬秋百巧未如拙

其三

春花豈勝秋新人不如故紛紛紅紫羣酣艷良未悟干
金買馬首百罔捕斃兔一曲雍門歌夕陽在高樹

其四

塞北多歸雁江南有去人塵寰回鶴夢神劍斂龍鱗童
冠同三月鶯花又一春羊裘灘底在吾欲問吾津

其五

試看春花萼朝來枝上疎有形寧免化何水不堪漁道
德五千字豪華十二衢寸心應未減長拱帝王居

送馬汝礪

山隱隱兮蛾眉草蒙茸兮綠髮送君去兮南浦君之情
兮北闕曰有罪兮薰天宜祝融兮鬼罰念莫撲兮燎原
悔厝薪兮直哭孰解網兮縱予懸明照兮日月牛刀用
兮雞豚宛駒變兮銜檠日宵宵兮飛鴻秋蕭蕭兮縱鷗
廬江兮悠悠黃堂兮突兀此判兮不改臣力兮當竭延
北望兮瀛洲儼瞻雲兮擁笏君恩兮碎首父誠兮銘骨
身則遠兮心邇孰朝寧兮巖窟

送王伯安還江東

吾欲歌吾詩歌詩已盈卷知君歸駕速不作題橋炫春
蘭與秋菊萬事類輪轉未成山龍補且息鷓鴣倦人從
日邊來豹向山中變長路多西風看雲亦北面誰垂見
花淚自鏃達犀箭國士稱無雙數竒本能戰況聞玉署
翁昨侍青宮燕神驚兔頰出目擊龍頭眩君學有源委
文場許獨擅高吟激青空逸草翻白練運斤忽成風疾
足詫追電志屈藝迺竒才高君不見伏波窮並堅淮陰

多益善木大須十圍金精亦百鍊
魏魏蓬萊宮鬱鬱白獸殿
看君來獻書首被賢良薦

送王僉憲分韻得事字

出門仰青天千里見孤翅
噓氣成采霞百鳥不敢企
借問希有鳥南遊欲何事
一蜚歷江海再舉掠恒冀
來遊大韶庭雖雖領羣瑞
亦有阿閣顛故巢尚深闕
帝許中翱翔銜書澤顛顛
鴻鵠豈不高鷹隼豈不鷲
一鳴天下春所貴在純粹
何異君子登快睹歆士類
鳳兮盍歸來

德輝正光被

秋風吟

驚飈振修麓
槁葉下喬林
怒號捲積靄
急轉揚輕翩
翩孤鳳雛
託身芳樹陰
中夜感簫韶
激烈發清音
下有抱貞士
聞之援素琴
一彈南山高
再彈流水深
離鸞與別鶴
嘹唳聲相尋
律呂轉清切
壯懷貯蕭森
誰言人生貴
無異巢中禽
得時應春鳴
遇寒亦哀吟
萬動各有息
睹物悟人心
服我敝緼袍
安知辟寒金

擬古

秋夜何迢迢蟋蟀鳴陰壁蟾升林薄見露下庭宇閒螢
火寒依人羸駒倦嘶樵開襟納虛明萬事謝忻戚

題林郎中瞻雲卷

南望烏石山白雲何悠悠下有仙人居玉宇對瓊樓開
籠縱白鶴鑿沼盤蒼蚪樓前樹龍葱結實長千秋仙人
不下堂白髮初蒙頭養雛能冲霄一一動宸旒銜來五
色書閃爍銀垂鈎大雛奮四海健翮橫九州小雛鳴朝

陽逸響和鳴球仰窺白雲飛悵然念遠遊開軒列屏素
徧與良工謀圖茲一寸心聊以紓百憂南山突兀起海
水東南流長松聳孤翠陰壑風颭颭王母開瑤池旨酒
復嘉羞紫氣浮霞觴宴集多仙儔酒酣迭稱壽屈指不
計周笑指海上山消搖發清謳

觀麥

步出城東門微徑南迤邐騁馬歷磊确春光何靡靡蘇
紫及藍黃瑣細不足指引睇耒耜外薶麥方窺窺晴浪

淺不揚頽雲互偃倚驚鳥鶩然飛翠色墮欲起萬旗森
摩戛力與東風抵芭桑繫高吟宛若大將壘馮虛縱遐
矚詩興勃填委朝霞餐未饜清颺歷牙齒馬上捐農夫
願言滌兩耳年來有司良民得展四體去冬雪何厚膏
澤尚漫瀾朝夕時雨降足食良可擬感茲芻蕘言志動
氣亦喜揮鞭聊一吟慷慨殊未已

月夜同諸友歸自徐村

驅馬臨高臺月色瑩如鏡衆星吐寒芒東方橫斗柄宇

定光自發林深鳥相慶
驢思棧豆鳴人有歸風詠吾曹
際明時為道俱希聖
貧同一瓢顏貴比萬鍾
孟所重在操存原思果非病
譬彼道邊木枝柯何枯硬
白日發榮華春條漸繁盛
吁嗟枯易榮豈不由正性
飛雲無長停流電無久映
今我不馳驅歲月忽欲竟

擬君子有所思

朝登黃金門暮上白玉堂
清飈播柔絃倏忽變炎涼
蟋蟀吟苔砌宵行流夜光
雲漢懸西南星斗何縱橫
唐虞

布文德中國奏韶章羣后讓於朝鳳凰亦來翔流音激
青霄奮翮向朝陽萬動各飛奔賴此一人慶志士思喪
元賢人願垂芳攬鏡照容鬢無使生秋霜不及少壯時
攄此忠義腸仰視西日速怛然令內傷

田居

五月麥風清新蟬占高柳緩行向南阡延望亦已久露
氣濡我裳枯芒森觸手遺禾資貧窶豈獨利寡婦緬思
先王時世道何忠厚老死民不流官長鮮迎走終歲庸

數朝方田給十口庖厨雖未豐雞豚養黃耆一自澆偽
滋此言遂成否甌石猶不盈焉知肉與酒世降苟如茲
吾於爾何有

送馬汝礪次韻

歲事如流星奄忽迫遲暮甫愛槐陰庭旋看蓼花渡西
風撼秋色況值連夜雨瑤琴不成調簷溜下如注緬懷
同心人自昔無箴怒芝蘭許深入蓬藿賴持護鄰芳得
屢接家善本多祚壯如百堵幹足以保顛仆庶如千頃

波所志在清素文如布帛衣不但形月露直繩置我旁
曲木豈回互寶鑑懸我前清輝照門戶君去我懸榻我
來君倒屣漢禁柳色稠吟情屢相付膠漆方謂堅萍梗
乃有數我歸萊子衣君徒廬江路離合奚足云窮通理
其固不見閭閻人隆寒出無袴睠彼貴介子裘狐仍舞
鷺託身穹壤間何異草與樹溪澗自謂清潢潦豈知污
娟娟如花人恥逢東鄰嫗寧知衆物情長短無定度運
改王孫饑時來奴臺飫此事難重陳君子道以助不須

叩禪關萬想勞頓悟靜聞發天籟浩蕩如大護君能久
此安胡為不興慕況乃椿庭翁耆儒德猶孺包荒門下
士發憤肆傾吐誰嗤吾贈言祇以道舊故

秋日寄宋侍御

西風吹鬢毛忽忽驚節變疎籬漸飛螢故壘欲辭燕亦
有蚊雷鳴中夜捉紈扇緬懷同心人悵望不可見起對
庭前花銀河白如練況逢重七日兒女試鍼線寧知牛
與女此夕真歡宴百年離合情忽如萍蓬轉富貴浮空

雲豪奢落花片安能不銜杯苦與歲月戰黃金不鑄身
白石不鏤面負此今時節回首歲將晏

原上

東風吹古丘白楊何蕭蕭烏鴉號樹顛鳴鳩亦飄颻昔
我先世祖挺身自芻蕘種德發餘光甘貧長寂寥源深
流易長本厚木斯喬累葉繼衣冠金門擁瓊瑤誰云高
堂鼎不自陋卷瓢徘徊陟墓道瞻望心搖搖西山鬱龍
蔥爽氣干雲霄荆莽蔽人目草色春含嬌陽和發幽響

好鳥協笙簫黍稷各通誠戴白與垂髻念入千載深魂
魄良可招登車懼任重橫帶愧虛驕榮華豈不美君子
貴後凋

謁王滹南先生祠

行過數仞宮步自廡南入古祠就荒頓穹碑猶岌岌敗
瓦翳綠草頽垣跛而立感此百代人安能不於邑在昔
金氏興豪傑稍驅集惟公負雄才辯博人鮮及入掌絲
綸言侃侃激懦習砥柱不隨流珪璋有操執著書闡墳

典文義無蹈襲鄉邦識楷範後進勞引汲能使綺紈子
森然如響翁豈徒富文學自是高品級下視饕餮徒何
翅相百十古人不可作流風振原隰愧我後知人徒然
負書笈登堂顏欲汗端拱還趨揖虛位滿塵埃戶牖莓
苔澁陋巷諒不改行者為迫急文芒無由睹樹杪光熠
熠

題長春軒詩卷

春陽無恒燠春雨無恒滋如何軒中人日詠長春詩豈

有師文絃如彼魯陽麾至哉萬化源舒慘固自知庭除
辟餘壤百卉紛及時春蘭色可悅秋菊亦垂垂脩樹交
清陰好鳥鳴高枝俯窺華實繁仰視風霆馳吟嘯皆春
風習習被朱絲有時擊墜露咀嚼療晨飢乃知廣文飯
不異商嶺芝平生執經人廟堂今設施珍重葱鬱間或
有棟梁姿

古別離曲

官楊何青青野花明道傍妾東君向西坐見道路長留

妾千金刀贈君雙鳴璫日月如流星歲暮永相望

雜詩

涼風動書幔彷彿西南來庭柯下露葉唵咽遞相催
瓜蔓滯宿雨裊裊蒙塵埃草蟲堦下鳴流螢亦徘徊坐感
歲事速忽如車輪推門前有層城層城復高臺乘風欲
登眺仰邈天漢迴帝子不可見青鳥非良媒中夜耿深
憂淚落秋生苔

逢太原故人

浮生易飄轉忽如車轂塵與子十年別念君如舊貧感
慨奏詩篇況復屆陽春為問城中景一一及交親白壁
猶待價巨魚多戢鱗昔時富遊子忽為寒乞身荒蕪積
水處時見紅樓新賤子負干戈依然羈旅人遭逢太平
年幸免罹苦辛感此人事變對談忽忘真

池上

良辰不易得池上一來臨微風感新綠幽蘭欣客襟方
洲語鳴鳥忽如鼓瑟琴悠悠南行雲成此匝地陰美人

隔千里贈我百煉金我有錦綬帶願言結同心

漫書二首

嶧陽生孤桐弦之以吳絲坐令風雨色變出陽春詞可
以養聖性可以獻帝堦孤高諒有合君子貴後時

其二

曾子曰在野食力事躬耕納屨踵時決掩肘衿不盈豈
無百鎰餽乖義色所輕天光觸鳴籟商頌出金聲終焉
領聖業千載崇鉅名

秋夜

蕭蕭暮秋意似與騷人期
西風淒布袍河漢影垂垂
高城奏清角感愴有餘悲
故壘欲辭燕殘蟬猶附枝
烹羊及魚羔農家欣及時
不念抱窮士文章光陸離
忽觸秋濤聲壯懷良在茲

小園雨後二首

新雨膏炎壑遠風滌繁林
取涼李井上仲子跡可尋
玄駒下危堙屈蠖鳴幽陰
萬類均一適忘古安有今
雖復

病兩背稍在愜孤襟密雲焉久留素石悟同心

其二

夏木豈無陰古井亦有泉陰疎僅自庇泉苦得永年義
黃世遼邈疇與論自然稍喜禾稼成藜藿比醲鮮浮生
能幾許沈鬱貴自宣偃卧輓轡側南風勻樹弦

夏夕

暮色蒼然至涼思澹盈衿坐閱古人編稍見古人心遙
岑出天末薄靄凝夏林羣動各有息衡門幽且深

擬古

翩翩海中蚌長養非一朝
含靈向秋浦出沒隨春潮
展月夜咀華精與洞丹霄
孕為徑寸珠光采兼瓊瑤
遠人致筐篚萬寶坐自消
本期綴冕旒何意投寂寥
聖王惜合抱尺朽安足嘲

寄所知

昨夜清颺發懷君在遠道
雙魚不可託寂寞對池草
寒露日夕凝林麓霜苦早
誰念裘褐單泥滓難自保
百年

會有樂中歲已枯槁如何日萼萼復為毫末惱濁酒幸
滿尊藜藿亦堪飽同心盍來歸盤桓以怡老

五月朔日獨坐

風日昨炎燠坐睹麥秋暮青山當戶牖黃塵滿歧路旅
舍亦宏敞夕陰舞嘉樹羈鳥恒思歸舉翼未能去極目
西南天哀鳴亂幽緒

春日雜言

長空多浮雲微雨露四郊美人隔蘭渚雜佩不可要去

年梁間燕今歲將尋巢時物各芬芳吾興亦飄飄珠箔
障東風星月耿深宵欲理陽春詞朱絃為君調

二十五日有作

悴葉看復脫遠聽無回音美環墮石砌破碎安可任平
生氣頗逸不受萬事侵幾因兒女曹折盡壯士心南舟
駕言邁先壟行復尋感此重悽惻何用榮朝簪牀頭富
緗紵囊中有素琴恨來煮白鶴放歌青松林

漢宮詞

漢宮有明月秋風悴碧枝紫苔繡壁帶積翠隱眾籬夜
久星河變人來鸚鵡知舊恩隨露瀉餘懽與日移尚憶
朝辭輦深承夜誦詩陽阿新得幸谷永況多辭指斥椒
房寵吹求飾室疵縈枯付堦草物化效冰漸無言掩明
鏡千古妬蛾眉

熊峯集卷一

欽定四庫全書

熊峯集卷二

明 石珪 撰

詩

七言古

阿堵歌

銅山夜燄熏天紅寶鼎不藉鈴椎功東吳黠匠誇老手
一日萬斛海水空何人冷笑九府公逆凜已死惟佞通

虛名狼籍遍天下赤龍不救騰蛇窮沈郎兄弟一朝貴
坐困海內諸豪雄金門紫闥明出入鴟龜得志聲隆隆
北州司徒枉才士腥風一流千萬里雀環太尉那易逢
直須痛飲潯陽市蚨婆生兒好顏色豈徒褒妲能傾國
一丈珊瑚滿塢金千年不化饕翁血九達一動呼魯褒
剛風颭颭吹布袍阿堵繞身凡幾遭鱗忽觸南斗高
爛醉起來不脫口鳳凰下視百鳥空嘈嘈

春鴻曲

春宵愛月登高臺舉首忽見賓鴻來平沙漸煖關塞濶
長空萬里心悠哉亦知陽生進君子嗷嗷不似三秋哀
揮絃振衣喜欲舞九陌何人更桴鼓山川遙望雲滃然
定是今年好風雨五日一雨十日風百穀盡麗陽和中
陽和復陽和東風動微波開蓮誇並蒂實穎愛同禾野
人還笑春鴻曲不似武皇朱雁歌

擬古巫山高

巫山高十二重攢峯繡出青芙蓉朝雲不還暮雨歇金

輿冷落雙盤龍秋橫素山澹相續萬壑鳴泉響寒玉風
流宋玉況多情揮絃更奏相思曲曲聲嘹亮繞天愁雨
態雲情凝不流寒煙裙紫草鈿碧楚王猶在離宮泣

東閣奉試梧桐夜雨

街前碧梧十丈長下有鸛鶴上鳳凰鳳凰西飛碧梧老
朝風暮雨能凋傷乍聞嘖嘖如私語忽疑四壁鳴蛩螿
黃金井邊玉轆轤銀瓶汲水聲琅琅推枕啓門望雲色
簷溜滴我羅衣裳倏忽雲消星斗出婆婆老幹猶昂藏

道旁何人更太息問之無乃蔡中郎願得孤枝折贈君
絃以朱絲發宮商

題南山樵隱

采采山木凌虛上征松檜干雲幽隱乍明下有飲澗之
羣猿上有鳴鳥之嚶嚶短柯一振山谷應豕鹿辟易豺
羆驚吾聞仲夏斬陰木百草黃落秋令行先刊舊翳後
樸椒鉅材養之待棟楹城中貴薪若貴桂兩肩取足何
求羸從來賢達適志耳豈山而樵惟董生勞形不殊

抱甕叟食力亦有孺子耕嗟哉樵隱有至理機事未忘
安可評

東溪漁樂

敲針作鈎絲作綸結繩作網網目陳長竿裊裊波粼粼
遠風來吹頭上巾江花野草俱可悅海鶴嘹唳山猿嘖
疇知造物有深意坐我寂寞之江濱得魚換酒亦易致
樂與莊叟怡吾真不須羊裘與鶴氅磯頭磊石高嶙峋
意苟造適境亦化不覺宇宙安有人溪南野老相勞問

世事了不胃其唇但言堯舜已在上巢許應為草莽臣
送王懋綸僉憲還蜀

我眉山錦江水送君西南幾千里秋光如畫當馬頭江
草江花何靡靡鳴騶夾道驚人玉堂霏屑冰霜新丈
夫得志橫四海馬得獨守蓬瀛春當時李杜亦落落山
川尚擬歲精神今人古人車跡多豪華過眼東流波及
時肝膽報明主躍馬食肉亦不頗君看孔明廟前栢銅
柯鐵榦猶嗟我不然託體金鑾坡朝朝染翰宵鳴珂螢

流雷瞥亦頃刻奈此日近清光何

擬古傷歌行

葉落花殘君不見春來秋去如飛電富貴千年劫火灰
丘陵幾度桑田變五侯高樓臨大道寶釵金鈿埋秋草
張放寧知金穴平楊家一旦冰山倒君看荒塚饒荆棘
當年俱有回天力勸君對酒且高歌莫負庭前芳草色

田家行

上岡下岡走僕僕驅牛下岡上岡宿岡頭風雨多則多

畏有兒童來牧犢短裙蔽膝筐繫肩此是貧人來拾田
老夫渾有十畝麥大半人家種子錢年年田中穡不斂
今年刮田如鏡面秋田雖好猶未熟熟時更有還官穀
東華真人圖代寅軒先生題

徐生入海不復還人傳已在三神山山頭宮殿千萬間
青玉琢戶黃金鑲銀城射日日色斑望之可見不可攀
不可攀那可度誰人海上遇安期貌得山光入生素雕
瓊作樹瑤作華白壁樓中張采霞靈芝五色蒲九節青

鳥牕前墮紅雪蟠桃結實三千秋大仙小仙來宴遊或
駕蒼麟或驟赤蚪或乘白鹿或服青牛采丹葩兮綠萼
雜瑤草兮為羞揚清歌兮雲駐玉塵揮兮風流揚歌兮
揮塵吹簫兮擊鼓彈湘絃兮執鸞羽青鳳吟兮白鸞舞
吾不知其為誰或童顏而貌古東華真人鬚滿顚吐吞
日月餐風雷天漿一滴可以祛塵胎何況日飲三萬杯
黃芽夜半珠纍纍瑤光直上衝三台青頭童子時往來
我欲因之問王母瑤池之會豈可復得哉吾聞東方朔

李謫仙年來亦在瀛洲邊二君於我有舊故公其為我
相周旋不知竒辯猶能雄斗酒一吟今幾篇東華真人
笑不語但見花梢露如雨桃源舊事言未終回首洪波
幾桑土

題瓜瓞圖為劉驗封

岡頭十畝春膏足曉色和煙放新綠雕雲撲地正離離
忽覩金葩明繡褥長莖短蔓相鈎連巨瓜小瓞珠璧聯
蛟龍得雨欲飛走虎豹出穴猶聯拳誰言將軍印如斗

掇取纍纍繫雙肘分明釀作清冷泉丹砂玉屑爭春妍
士庶不敢輕寔齧錦幕獻將天子前憶昔名工發毫素
豈乏青山與茂樹長風悠悠度阡陌平林藹藹蒙煙霧
謬說根從海上移直疑家近青門住文章五色未足雄
子孫千億將無同周人昨夜奏絲竹此意猶播聲詩中
瓜瓞兮綿綿綿綿兮瓜瓞為君再頌大雅篇齒頰依稀
洞冰雪

桑條韋

桑條韋青青照田圃二月神龍不行雨綠陰婀娜宿鸚
鵡桑韋正含滋鸚鵡來哺兒鳴鳩戩其羽戴勝無降時
忙殺蠶姑推散絲宮中筐筥那得知一絲兩絲縲未盡
倦點牙籌上堂寢健蛾鼓翅搖春魂蹋碎珊瑚黛眉損
桑韋桑韋好歸根城南斤斧星月屯潞州別駕宜少恩
豹鞬騎士身虎文

夢程正之

少陵三夜夢謫仙魂來魄往楓林前今吾夢君亦連夕

邂逅相逢道相憶似為九天風露長悵望江南歸未得
布帷夜久風淒淒顛倒衣裳為君啼鴟梟得志燕雀舉
鳳鳥文章無宿栖昊天七政誰與齊璣衡倒植昂或低
臯陶五帝不可問坐對青燈落寒燼人生逆旅會有歸
但取榮名比華袞

登臨篇

登高丘臨清流驚濤拍岸風蕭颯東奔到海何日休浮
生聚散類萍梗滿地花草凝閒愁士稚空盟大江楫仲

宣復上荆南樓日落蒼梧思帝子風生蘆葉按伊州富
貴豪華成莽蒼斜月窺林影千丈誰家金塢草猶黃舊
日歌臺人竟往舊人已往新復來仍張寶瑟勸金杯流
魚偶與水相得長嘯不知山欲摧鬢毛未白心成灰城
南啼鳥聲絕哀長空蘸酒波瀕洞峻坂墮足愁崔嵬仰
天憤頓一起舞蹋碎石壕千古苔

清夜遊

宮夜泠泠月華白嬌騎踏空紅墮雪西園門外馱鼓聲

十六院中樂齊發楊郎蕭郎各一席千年噬臂宮娃泣
坐中誰是陳宣華寶帶猶拴繡同結芰荷風柔耐酒霞
錦繒綉樹啼雙鴉侍臣自舞王自歌蜥蜴香銷金縷紗
佛經僕射呼不起梁燕才人竟冤死潼門烽火照宮紅
猶自心輕漢天子龍舟翩翩蔽白日醉擁笙歌南下疾
一聲悲鐸不堪聽至今江柳生愁色

秋蓮曲

西塘菡萏初破紅小舟蕩漾東南風羅裙曳水蘸輕碧

驚起沙頭雙落鴻
昨日采蓮蓮尚好
今朝采蓮蓮已老
綠房結子空垂垂
翠黛朱顏可長保
江湖日暮生嫩寒
鴛鴦雙飛不過灘
回首女伴各無語
淚洒銅仙承露盤

有所思

雙星熒熒隔秋水
秋入城頭漏聲裏
牕間梧桐風瑟瑟
青鳥南飛月華白
朱絃一撥意已傳
夢繞博山雙紫煙
藕絲易脫雲易散
十二碧峯秋雨前

送靜學先生南還

文星夜半屬紫薇北門學士江南歸江頭新水漾輕舸
清嘯裂空雲不飛壯遊絕勝窺禹穴錦袍不獨誇漁磯
憂深廊廟見顏色歷盡世味忘甘肥鍾山直道饑花鳥
寧知袞職思華藻鉅筆明教賦兩都安車又見迎三老
龍門賤士言非夸海內文章公大家公方鵬運擊千里
賤士望洋真井蛙他日龍泉如可用雷生爭敢負張華

傷徵伯

冀北多駿馬君才自乘黃長安多神雀君才自孤凰一

鳴安足盡子志快覽六合窺無旁東遊名山跨絕頂詞
賦一吐千丈長槐花照地爛宮綺四方學士奔且僵天
門咫尺病在牀老兔泣月秋無光平生佳句漫收錄上
公來看淚如瀑碧水愁深洗墨池幽庭恨折棲鸞竹海
波東流日西傾古來輶軻幾豪英鵬鳥不還賈太傅鸚
鵡重傷禰正平造物生才意良亟往往棄之不甚惜豈
有蒼天忌令名至今蘭畹生荆棘世間萬事莫開口誰
人松柏誰蒲柳陵谷猶應有變遷神仙詎謂能長久因

君感慨壯且哀樓外瑟瑟陰風來君豈復能登高臺長
流濯足一萬里落日高歌三百杯人生有生會有盡清
淚等閒成綠苔

競渡辭

競渡復競渡波光浩渺潮頭如馬來舟子疾於鳥輕
舠迅楫鬪繽紛伊誰從之楚靈均江深海濶安得濟鼉
拊鯨吞愁殺人蒼天不照烈士苦日暮洞庭間擊鼓九
辨誰招夢澤魂一杯枉酌荆南土競渡兮來歸湖上兮

依依擢歌齊發淚沾衣寶笙瑤瑟清且哀四望躑躅悲
又悲安能遇君與君攜

暮夜金

暮夜金光陸離故人心君不知金經百煉不爽毫與釐
故人之心良似之還君金君往矣但願君為清白吏絕
勝千金報知己

九門城晨望

平原黍稷風淒淒漢家荒城大道西田間古瓦碧如鈿

海日欲上山禽啼村童掘鼠拾斷戟漁父高歌悲故堤
猶傳天寶盛烽燧軋犂山人貧艷妻汾陽血戰祿山死
杲卿義名恒嶽齊時移事去陵谷換車轂年年下長坂
草色猶連碣石青濤聲豈憚滄波遠武靈臺下春雲生
董相原前秋露明誰家牛背橫短笛高呼一聲千古情

秋園

露華綴草秋離離迴風捲葉揚赤旗老槐團團翠如蓋
山鳥欲下驚曲枝自臨古井牽素索農圃滋味須吾知

平生骨法本貧賤，謫仙福薄王濛癡。安能久躡名利場，
猛虎赴塘當無疑。雖非祀竈可卻老，庶幾服息能忘饑。
籬邊寒蛩忽唧唧，滿林秋色正歲隤。為君痛飲三百爵，
醉待明蟾生海涯。

神樹行

我家墳上老白楊，風摧雨蝕分枯朽。一脈纔存天地性，
十年更作風雷吼。崛起似有神，明扶發榮却在凋傷後。
路傍行人坐歎息，此事依稀古曾有。上林高柳僵復生，

田家紫荊悴重茂間關海嶠存遺孤幹轉乾坤賴貞婦
豈獨義擬衛共姜自是忠同晉杵臼秋霜照膽繁本枝
幽谷回陽保長久龍皮屈律張萬鱗虎骨聯拳露雙肘
氣排霄漢春愈滋勢壓郊原地增秀陰功自得天維持
世澤誰知自忠厚臨風瞻拜思不窮更祝多男與多壽

有所思

東風二月揚新沙憶醉燕南豪士家狂歌劇舞共春色
正值東鄰桃始華情闌每厭箏笛聒意放不遣山林遮

船頭詩篇船尾酒解纜直下清溪涯太原喬生興蹕絕
偏愛漁蓑冒風雪杯空正自吸流泉月出先判宿巖穴
封龍山人意原苦坐覺悲風起尊俎鬢星豈乏長安塵
衣斑尚帶西湖雨百年離合江上雲萬事紛紜江水紋
千里夕陽春草綠停雲空憶鮑參軍

秋塘曲

長陂水落魚龍冷芙蓉墮香菱葉靚采蓮猶繫青娃船
萍藻中間照粧影岸上人語積漸稀羅袂掩面踏船歸

亦知明年荷復出但恐綠鬢失芳菲人間白日不重午
黃金自可當年揮悲歌一聲下江渚回頭更見鴛鴦侶
落日悲風葉亂飛藕絲愁緒俱千縷

招隱詞

秋山慘慄兮吾土肥園蔬畹藥兮猶光輝路餘菅兮可
緝屨池有荷兮能製衣山中之美人兮胡不歸秋江兮
白蘋綠波起兮魚鱗鱗吹長笛兮激丹唇鳥盈盈兮雲
紛紛胡不歸兮山中之美人吾尊兮有酒呼明月兮當

躡綠竹兮與鄰清風兮為友美人樂兮且久綠顏兮皓
首

望蒼巖行

蒼巖之山在何許大行東來如馬駐上有千年不老之
長松下有清泉及茂樹顛猿棲其中千歲亦不去玄鳥
吐雲白鹿走異相不獨隋帝女山翁飲水猶綠髮野草
通靈亦金縷吁嗟乎佳哉名山神仙直在天壤間我欲
從之問大還路遠莫致行苦艱但見淑氣擁丹閣竒峯

歷錄青如環百里之外且如此何況暮宿玄圃朝洎盤
人生不滿百日月凋朱顏安能不行樂苦為名利慳到
頭鐘鼎亦徒爾眼前行路猶間關君胡不歸來山水有
餘歡吾為汝致安期棗更為汝栽武陵花黃童高歌素
女舞同醉吹笙王子家

溪亭

溪南小亭清且孤漁父送酒剛百壺水風欺人雙鬢短
飛瀑不救詩腸枯輕帆翩翩進復却蒲梢初長蓮未萼

惟有楊花恨別離化為萍草猶飄泊浮生百年無定蹤
太平景象長雍容不妨爛醉卧溪上夜聽黑潭鳴水龍

灌木詞

灌木萋萋兮露既濡草抽萌兮楊垂須岵不可陟兮屺
不可踰白日皎皎兮下丘墟神飛越兮道阻迂仰歸雲
兮不能俱園有桑兮巷亦有車嗟祀事兮弗馳弗驅墮
涕淚兮庭之隅金章赤紱兮徒華吾軀

行路難

我歌行路難路行人聽之羊腸鳥道未足險眼前蟻垤
何參差去年栽花今荆棘舞臺歌榭無顏色朝朝風雨
夜未休美人空抱瑤絃泣湘江欲歸歸未得霜華剝盡
秋蟬翼但覺年光逐逝波不知何地留歡國行路難不
能不行奈路何寶刀駿馬成蹉跎道逢酒伴且痛飲世
上知心本不多

燕歌行次靜夫都憲韻

東風吹古丘客淚垂清潛燕豪凍欲死劍指無閭山彎

弓夜獵黃草灣層岡上接飛猿攀錦弢銀甲四十萬往
往馳驟呼沱間秦人遠交衆不悟魯猶姑息齊何頑千
金致士一語走何怪白日開函關報燕書成事已去拒
秦壁返謀何慳英雄忽隨易水逝境地豈復長城閑至
今國士猶感慨似有劍氣藏蓬管時清兵甲棄不用世
上耆叟多清閒鶡冠者誰雙鬢斑高歌欲挽餘風還先
王治日未忘亂夜拭龍泉照酒顏

題老子出關圖

南山爽氣開秋晴紫蛻抱天西北橫關門令尹早聞道
周柱下史能研精青牛脚健風雨急彤芝作蓋雲崢嶸
乾坤合放雙眼碧河漢欲繞颺輪行窪盈白黑萬物理
浩蕩廣莫真人情無為始知有至治抱一可與言長生
崆峒山前逢廣成海上舊結安期盟露桃棗共春色
雲際彷彿聞竽笙江樓夜悄醉華月文星燄屬三台明
瑤宮銀闕望縹緲青驪誰識芙蓉城大江東流秋水清
梧岡日上天雞鳴千金為壽未足貴願逐羣仙歌太平

都貞婦辭

秋霜雨空白日孤老死不逢程大夫新鳳僮僮自哺雛
十年淚著梧桐枯亂來誰問唐與都徐家弱女能奉姑
冰輝玉映如合符古人誰云今絕無似聞義壻報翁死
節婦之子宜有此

碧牕曲

銀河夜悄冰蟾泣露蕊風荷軟無力香奩半掩碧菱光
獨向牕間理蟬翼南風挾雨江雲濕綠怨紅愁滿胸臆

可憐明月如青鏡不照妾心同鐵石
人生命薄空自惜
轉眼風光成故迹願郎身與松柏堅
隨意萋萋寒草碧

初涼曲

新涼入幃秋思醒
簾間嘖嘖絡緯鳴
起看銀河墮金屋
仙槎髣髴空中行
西風桂屑晨盈盈
露盤不假丹砂成
九華真人亦珠履
何必六貴誇簪纓
曲江春水春又生
過雁千古誰遺聲
飛黃未落祖鞭後
白壁坐使秦城輕
金陵酒美舊有名
吳娃再見髮已星
龍泉解換一石五

正值城南風稍晴

浩歌行

春風秋月何年畢
今人古人三萬日
少年不覺成壯夫
一日悲歌長六七
人人都說太平年
年來去年亦忽然
未論功名到鐘鼎
須臾白日凋朱顏
君看書劍還如故
煙閣雲臺不知處
古道聊驅羸馬行
壯心幾逐飛龍去
長安辯士如懸河
豪氣能傾馬伏波
簪纓貂錦一朝歇
露盤仙掌仍嗟我
君不見杯中酒
又不見筵前歌酒闌

歌盡人何在依舊年年芳草多金印玉腰真可羨丈夫
未遇欲如何

望春曲

百花籬邊夜飛雨蛺蝶愁多散還聚惜春心緒無奈何
欲逐遊絲成萬縷花間好鳥鳴咕咕柳風吹綿繞天末
一春不敢上高樓記得樓前嘶叱撥郎去去不來花殘
春又開門前遠人語又是寄書回

送劉司直先生使淮府

朔風吹南騎宛轉如游龍中夜戒僕夫行行未從容麒麟殿前初降節華萼樓外猶聞鐘君言入耳那敢宿飛雲極目何重重翰林主人留不得江南碧草生春色乘風欲濯大江流驚散鴛鴦與鷓鴣江流潺潺幾千里君王恩深如厚地赤社遙看金冊來故鄉又見文星至君不見昔日巴蜀還相如縣官先驅光里閭佳哉此行良似之志況不在駟馬車胸中錦繡萬段餘時乎可卷亦可舒但恐江山未容盡高興講殿日來催進書

冬日寄雷廣文

迴風壘紅葉簇簇綺縠紋栗烈薄重裘東隅負微曛當
軒對酒不能飲忽憶郡中雷廣文廣文甲第陽和西朝
朝冠蓋夕輪蹄置酒耆英日高會門前突兀青雲梯雲
梯聳寥廓東望大悲閣門楣瑩如洗南瞰滹沱水閣勢
崢嶸千仞高老鶴直上危顛號吐吞雲物挹四極下視
羣動如蟬螯滹水奔霆入溟渤怒濤洶湧如車突海神
夜起探滄波萬顆珠光弄明月國之雄觀乃如此士生

其間富文字歷都並海筆力肆我欲問之司馬史嗟哉
山川勃鬱鍾豪英英風豪氣還與山閣相支撐摩空作
賦聲鏗鉤詞源一決翻鯤鯨憶昨登筵一相見孔融新
識龍門面饜飫清芬十五年使我傾蓋心怡然丈夫避
逅有相感雄襟縱發時翩翩公顏如童髮如絲日服沆
瀣與朝曦風煙近望阻談笑倚劍長吟有所思

留贈翟克徵

海魚移來海邊住照耀海水生紫霧鳳皇亦繞丹山飛

采霞光屬青桐樹丈夫遠志千萬里幽冀朝遊青充暮
浩浩長風振佩環悠悠芳草迷歸路逢人盡與道寒暄
論心何必分新故相期巨擘俱搏雲不學寒蟬空飲露
君家善慶間有餘大鴻臚卿亦新除攀龍不獨一身貴
掛角況有當時書我行共北拭雙眼青雲有意君何如

東閣試春日喜雨

西山多積雪日暮呈清光協風自東來吹綠到池塘
池塘昨夜春草生羣鴉啞啞含春情遙聽宮車藉千畝輓

轆聲轉輕雷鳴青帝勾芒驅白衣中天倏忽晦復明六
街無塵見甘雨誰將萬斛珠璣傾曾見珠璣雨下土無
食無衣竟何補但願淋漓浸田壟壟頭不獨商羊舞小
兒拍手歌太平老人援枹擊土鼓西牕兀坐興有餘陰
陰草色侵庭除披衣登高發長嘯王家膏澤真隨車北
望銀山氣蔥鬱喬松老栢青扶疎青扶疎雨如液農夫
荷耒正南行桑柘無煙芳草碧

惜春詞

青瑣燒燈人夜語起看天桃落紅雨蕩漾春光繫不回
楊條枉自垂千縷南鄰少婦色惆悵朝朝獨上粧樓望
封侯不顧家存亡何必薄情惟魯將

傷哉行

誰言負休不擇地青苔白石安可棄誰言貧仕不擇祿
人情一旦如轉轂東家生子頎且長西家小兒亦相當
魚龍頭角或上下鳳毛鴻翼俱翱翔九重昨夜下明詔
東家蓬戶生光耀少年位列執金吾擁者擁兮趨者趨

懷寶不售君子節太息西兒猶服儒街前燕雀無慮萬
朝朝東飛暮西返東家畫梁穩可棲切莫隨風飛向西
西家網羅不可度門前冷落無遺梯嗟哉人情反覆安
有公燕雀亦與人情同回身掩戶且高卧安用空羅張
晚風

擬古遠離別

風飄飄雨蕭蕭落木下寒蟬號長相思綠滿枝東流波
無盡時送君長安道傷心對秋草祇道蠶時歸而今桑

已老君真棄妾妾憐君暮暮朝朝作雨雲隨風忽上君
衣袖莫道無聲君不聞

美人歌題潘侍御畫

綠牕朱戶悄無人花枝照眼明青春美人睡起向花語
驚回蝴蝶飛西鄰珮環欲整嬌未已蝴蝶不來花莫嗔
寒煙作愁千萬縷鶯梭燕剪催人頻機頭織羅纔丈二
冉冉日月將逾旬舅姑年來厭紈綺此羅豈欲榮妾身
聞道兒夫致將相織成仍繡雙麒麟君不聞樂羊妻有

言繭絲積寸至丈匹天下事難倉卒成獨立清陰花繞
膝

題李冬官時升墨竹

淇園園中萬竿竹疎如離人密如簇清陰不逐梧桐梢
高榦還來鳳凰宿長空夜寒雲不流鳳凰雖鳴上頭
媧皇倚聽截笙管一十二簧聲遞換漢中郎笛秦女簫
律呂隨風切雲漢君不見王子猷此君不可一日無又
不見阮嗣宗中林嘯傲仍提壺謫仙之裔亦愛此高興

復與前人殊欲劉老節紀故事汗青滴滴秋霜孤枝柯
瑣屑亦不棄急呼毛穎濡其須上下百千萬億載潛光
寒骨蒙褒誅嗟哉虛心致用君子器乘時釣寵非吾徒
為語徂徠及新甫同盟歲晏期不渝

上劉司徒

東南白鶴清且孤往歲亦上黃河圖刊山注海功立就
萬姓得免魚鼈區商宗午夜夢良弼曉入豸府風雷俱
諸難歷嘗漢太傅三物竟付周司徒平生蓬藿切山斗

畫省未敢輕樞趨涯師丈席一相睹冰雪落齒幽襟乎
維公鳳凰下千仞安能顧此雞與鳧芝蘭蕭艾兩不棄
亦謂此是同年雖開心已覺江海傾憂世忽睹春陽鋪
宰臣謀國知即語遠視萬里如坐隅嗟哉萬事動有拘
安得回天如轉樞上為文武佐張弛下為匹夫匹婦完
肌膚後生小子非獻諛亦豈抵好吹齋等斯文世契有
相感景望詎忍分雲塗

聽雨

芙蓉出水高作盤夜來著雨聲珊珊客愁萬種滴未盡
離夢五更敲欲殘翠衾生寒花氣濕庭階無人蟲唧唧
起看綠柄仍扶疎何處湘靈鼓瑤瑟君不見芭蕉葉梧
桐枝離人一聽思千里亦有潸然墮淚時闌前不復植
此種恐經百感凋華姿今宵忽聽荷盤雨依舊聞愁千
萬縷乃知古來壯士多悲心不用當筵怨歌舞

東風別

我欲留東風東風不可留百花吹盡已無力青輿旋軫

芳池頭啾啾鳥聲啼不歇就中黃鸝最啁哳千呼萬轉
喚不回東風東風從此別嗟哉進退與疾遲不言君自
知陰陽莫道如環轉秋菊春蘭亦有時

樵山吟

樵夫歲歲居樵山短斧入山樵採還雙肩向市易斗粟
堂上日暮俱垂斑官家謬選備工役報國那能惜勛力
運斤直瞰危鶻巢喚侶時招牧牛笛寧知今年法令改
青山却用金錢買有斧不得重刊雲無錢誓欲先逾海

昨日城中丁壯來城中百事猶傷哉
析薪已費千餘萬賣子不足私門陪
衣裳藍縷敢自惜已看釜甑生塵埃
貧家止有田十畝定知明年非
我有安能遯跡豺虎之深林
縣官來時無處尋

吳侍御父母挽詩

青山日暮生紫烟豈有寶玉藏山顛
層巒如壁護風雨林鳥啞啞號旻天
山中行人知故事江南往日多遺賢
鼓琴不獨伯鸞隱亦有種德如耕田
人消歲改墓木拱

兒身復在君王邊
天書昨夜贈泉壤
寒光直與青山連
鳶肩多角世所貴
寧知季路心悽然
欲知季路心悽然
槩苦梅酸年又年

殘鶯歌

賤子歌殘鶯鶯歌聲
遞續負此垂楊陰
明朝日月促宛
轉復遲迴莫是離人曲
似恨上林枝春啼
猶未足玉堤
幾度聽淒清
半是湘靈鼓瑟聲
朝桃花上音難寫
暮雨臺中夢不成
幽谷東頭喬木近
殷勤更奏商絃引
征馬

踟躕淚暗垂芳心鬱結愁難盡殘鶯復殘鶯羈懷今夜
生茫茫海角難求友漠漠天涯誰有情須知不是烏衣
比空煩王謝堂中耳今人惟有利親不愛清秋愛暮
春老舌如簧君莫惜隄防利口能黃白

送伍朝信守寧波

官柳風柔拂酒盞渭北江東意何限五馬誰驅高蓋車
畫省秋雲猶滿眼纍纍肘印腰帶黃太守年纔三十強
閭門不敢鳴騶過里中長老多父行高堂日遲采衣舞

一觴一咏聲琅琅紫微鉅公顏色揚諸孫繞膝兒繞牀
牀頭經史映簪笏膝下懽娛殊未央親恩君寵兩磅礴
膏雨還隨使車落深村無吠獮公府多神雀愛月還登
鎮海樓尋幽或到燒丹壑鏡川幾曲春澄澄人言使君
如水清棠陰無事坐舒嘯惟聽江聲雜鳥聲

題程正郎蟾宮折桂瓊林錫宴詩卷

蟾宮前後交桂陰桂氣襲人寒不禁吳剛倚斧夜不寐
兔毫冷浸冰壺深青袍綠鬢誰氏子獨上雲霄親折取

歸時不遣素蛾知兩腋西風日千里東風吹塵紅映道
恩光著袍綠如草男兒得意非尋常出門仰天氣浩浩
雕瓊作樹瑤作華乘春早宴仙人家驀聽虞韶雜鳴鳳
停杯一嘯凌紫霞

聞羅景鳴入京

鯨牙漱海珠貝翻鼇足暴柱神鬼奔羅生尾月掣兔頰
橫筆如彗當天門列星吐燄燒紫垣銀潢小水漂崑崙
竒詞一放衆怪縮長劍倚日龍當軒江山何爾鬱始發

產此異物之輪困五經百子世所有咀嚼玩味平且溫
片詞尺論一經口歎作萬段霞紛綸羊腸詰屈未足險
驚雷破地山欲蹲宗師吐舌方朔走侈麗慎勿矜文園
況有元氣貫脈絡高深得奧愚駭繁聖朝文化洽寰海
閭閻草澤俱飾轅固應有此大匠手彫畫五輅修輪輻
綃纁紘紈方有待豈止山藻魚簾塤材竒並知世運美
士大始見民風敷有時調笑狎諸貴意氣豈睹崇與尊
我慚同袍更館閣寒鴻迺逐孤鳳騫徒能問字向揚子

敢望學劍逢公孫天南矯首識虹采詞海覲君能一援

遠別離

秦雲隴樹高復低君去臺輪西更西亦知此別經歲月
臨歧素手牽衣啼山長水深覓無處妾心如荼苦復苦
玉容顛頽金縷裂猶憶徘徊出門語春水易消雲易斷
妾意如何不零亂人生難得駐朱顏空帷夜長淚潸潸

長相思

長相思長且深暮雲湘水愁陰陰海棠庭院燕雙語惱

亂無人知妾心妾登池上樓淚滴池中水水聲活活向
東流妾淚將心千萬里

烏夜啼

庭前古槐猶未花寶釵晨入兒夫家兒夫重俠輕離別
空林夜半啼烏鴉誰將鴛枕千行淚却寄龍城萬里沙

折楊柳

千轍萬轍曉行車誰人折柳臨長渠紅顏皓齒春閨女
掩袂攀條獨無語秦樓不見吹簫人灞橋空有吟詩侶

天長海濶飛鵬翼迢迢直到天池息青瑣朱扉閉阿嬌
綺牕日暮生愁色

行路難

盧家語燕棲畫梁美人夜半宴蘭房瑤琴欲奏弦更張
移宮換羽聲低昂歌喉舞袖競韶光花顏照人藕骨香
歡娛欲盡解鳴璫寧知杖策走咸陽君門咫尺不得見
空彈長鈇歌清商世路崎嶇行不易丈夫未遇同尋常

怨歌行

黃牛將犢雞將雛辛苦不異汝與吾一朝雛犢背母死
洒淚空成草頭水梁間紫燕輕復斜誰歌烏衣野草花
紡執尚有未完線繡帖猶藏舊鏤紗吁嗟吾兒不還家
城南愁殺雙慈鴉

上殿熊

熊上殿昭儀趨誰其當者馮使好玉顏豈能編虎鬚不
難一死遮乘輿孟陽登牀信誑楚亦有華泉逢丑父分
明造次效忠貞豈意嬋媛成錯迕傅姬手持黃紙來昔

何勇銳今何哀兩朝淚濕黃金堦宮中妬色亦妬才

擬古將進酒

銅龍水澀蟾蜍泣桂花參差夜雲碧地上落葉何紛紛
花枝不似三春日鴻聲漸遠江水寒百年轉眼風月殘
夜深杯滿君莫難

寄衣曲

越絲迴波翔紫鳳丹芝水花相間香并刀剪綠藕絲脫
中有二十四鴛鴦碧牕夜寒鍼指冷一線未縫雙淚迸

秦雲隴樹千萬重
欲寄還愁道塗梗
封題錦字託衣中
殷勤先謝西飛鴻

銅雀臺

西陵綠樹無顏色
邯鄲女兒猶豔質
魏家空起千金臺
一旦飄零同瓦礫
名姝綺麗皆塵土
至今里女能歌舞
粧成仍唱望仙詞
夢回不記霓裳譜
人間白日奔隙駒
綠顏回首雪盈顱
秦樓楚榭今安在
日暮殘鴉下冷蕪

首陽薇

朝采薇露未晞夕采薇風淒淒岐山東來墨為線大白
小白懸兩旗食周之粟不如蕨與薇蕨薇雖不飽應是
商山草

娥媚謠

娥媚復娥媚不道李與桃阿嬌十四著繡袍錦襦雙佩
并州刀自從貞觀見天子宮粧靚麗珠鞋高親挑佛燈
誦佛語邂逅君王淚如雨未央前殿恰垂簾白馬道場
齊抱杵提兵誰遣太法師縛賊親煩長公主大雲經梵

不足聽天堂火發延御屏雨露新歸奉宸監浮屠鬼戰
金輪庭李花不開媚娘舞海內紛紛爭好武道旁誰遇
觸邪冠骨肉不如巖下土

磊砢行

深林人稀豺虎嗥荒崖墮石海激濤長安萬里烟浩浩
黃金觸手輕如毛貂裘敝盡何足惜腰下熒熒雙寶刀
西來黃塵撲天起將軍破敵見天子圍夫竈下盡蒙恩
困殺英雄老燕市燕南美人好顏色壓酒槽頭勸行客

東風舞折柳絲狂醉擊龍泉按歌拍歌聲嘹亮舞熊柔
不數當年宋意謳知已難逢頭易白出門跨馬路悠悠

迎冬詞

畫簷小鐵嘶北風疎櫳日影搖輕紅疊綺重茵夜雲暖
博山紫氣飛遙空霜淒落葉護寒井素綆縈紆指尖冷
翠屏東面繡新苔幼出瀟湘美人影日高寶瑟拂蛛絲
魚上深潭雀繞枝十二闌干烟細細伊州一曲譜相思

大陸行

大陸澤水秋泠泠葦花初白荷蓋青紅裙蕩槩紅波靚
八月江寒猶采菱菱角槎牙芡實滿明珠紫貝多零散
白日清歌應石淙黃昏鳴佩隨歸伴西風作惡凋苧衣
穠華回首葉飛飛塞鴻嘹唳江南歸陽和漸減霜生威
百年富貴轉眼非昔人遊處尚依稀水頭屏營見漁火
深夜洞房清淚微

陌上花歎

陌上花何離離秋風吹汝汝不知汝有丹葩及紫萼恨

汝不值瓊瑤池朝朝行人暮遊子泣露酣霞何日止花
枝漸減秋月寒獨抱餘芳道旁死不如二月楊柳綿猶
自飄颺帝城裏

八月九日雨

前年棘闈苦多雨觀音街前泥沒股單袍赤脚來叩簾
八郡英豪面如土今年此日雨復多長安走馬知如何
魚龍慣識風浪色禹門寧畏高差我衝冠已奪戰士氣
落筆不數將軍戈豈無昌黎豁衡嶽或有傳說為滂沱

桂香歲蕤晚含露天漢西流聞棹歌

大行山行

大行之山何崔嵬巖幽谷隱藏風雷漢軍已料騎士屈
魏武重歎車輪摧其開如陁下如井雲作炊烟瀑垂綆
羊牛只道來層霄雞犬方知接人境山僧何年住山頂
亦有山田二三頃非關避世應避名我欲從之玩流景

行遊樂

初夏清和燕子飛遊人陌上鬪輕肥羅襦小步作伴歸

翻浣宮袍新賜衣去年幽花恨欲死今年花飛逐流水
是處笙歌感歲華何人夜月思千里紛紛末俗不足謀
豈獨當時趙孟偷一餉清談誤平世空令兒輩說風流

城南思

肥壘城南花滿地紫燕雙飛掠香水雕題畫棟帶新巢
惆悵重來阿嬌死堂前寶瑟待新張短扇輕衫生細涼
疇知兒女成參商一日悲歌千斷腸窮通壽夭不有素
小智鍾情苦復苦輕顰巧笑尚平生骨肉分明化為土

城頭漏盡西日徂有錢莫下黃公壚爛醉百年何所惜
鸞鳳鴟鴞等無益

涼風曲

涼風涼風汝勿至行人為君掩雙耳綠楊蕭蕭葉半脫
一步愁深千萬里昨朝猶著越羅裳今夜洞房添錦綺
百年展轉涼復暄綠髮絲絲今幾縷涼風涼風汝勿至
江天寂寥愁到爾

妾薄命


女家趙下襄陽曲往來大河蕩輕漿嬌紅膩白照清波
一曲高歌衆惆悵去年花枝今又紅白日西沒月生東
顏色空隨落花陣恩情旋逐東南風當時容顏不自保
而今零落同秋草夜夜傷心淚暗垂出門萬里長安道

雨雁詞

猛雨斷哀雁離離不成行寒雲蔽關塞落月暗瀟湘樓
中鼓角飛秋霜仰看孤影空彷徨拈鍼繡作孤鴛鴦為
寄遠遊都下郎燈寒指冷夜寂寂獨抱瑤琴為君泣

郤湖獻

俠累死素絲僵近時裴公亦被創臣豈不念存與亡丈
夫許國能自臧況聞君王旰未食思政殿前還歎息不
才幸備鼎趾臣豈惜微軀化為腊江西湖南獻各寢頭
上神明方懍懍金吾兩尊夜逶迤臣有丹心為君盡撓
法全身臣豈忍



熊峯集卷二

欽定四庫全書

集部

熊峯集卷三

四

詳校官監察御史_臣曹坦

中書_臣劉源溥覆勘

總校官進士_臣朱鈐

校對官主事_臣陳文樞

謄錄監生_臣黃鵠

欽定四庫全書

熊峯集卷三

詩

五言律

晴郊觀麥

縱目晴郊外青青麥自芳
葉藏前夜雨花帶及時香
淺浪初凝綠輕雲欲試黃
東風來往拂應為兩岐忙

明 石珪 撰

睡起

白晝清如水當軒納好風形忘開口外樂在曲肱中竹
榻偏憐舊繩樞不避窮偶懷徐孺子還愧食非躬

晴坐

十日不作詩新晴偶撚髭冷雲含古意秋葉記相思疎
懶成何事蕭條對此時誰家砧杵急空亂郢人辭

秋雨

何事秋來雨蕭蕭便不同已愁聞落葉爭忍傍梧桐客

路思千里長門望九重幾人當此夜揮淚亦隨風

憶在京師與從善郎中雨中倡和頗多今君南

徙悵然有懷

對雨思前事揮毫憶俊才詩情同賈至仙客本天台別
後壇應冷春深鴈不來金陵城外路一日幾花開

春渡滹沱

世路無間日風波歲歲新東風沙上鴈落日岸頭人去
國曾千里還家又一春林花應笑客憂病往來頻

雪鴈

懶客無多興庭寒晝掩扉幾人江上釣一雁雪中歸獨
往心何壯遺音世自稀春來諸伴侶有願莫相違

題董太守連枝巷

手澤經年在深悲人未知陟岡空有望同被已無時老
墮風前淚靈鍾雨後芝他年羣從輩長合誦遺詩

靜夜

十日不對鏡新霜又幾莖疎燈長伴客過鴈一留聲鐘

磬城中滿星河檻外明遙聞花月院停杵話西征

和許黃門九日述懷

往日看花興中年苦太遲靜開平世眼閒對廩秋時風
雨催枯榦江山得幾詩因懷工部句瀕老釋歡悲

宿性公院

清齋夜無寐星月耿前除野客尋詩罷高僧入定初欲
來還去夢纔讀又忘書豈為悲華髮聰明漸不如

出西郊

久積丘園思春深始出城
水添幽澗滿花發舊枝明
野哭聞修祭田炊見餉耕
年光隨眼過幾度得閒行

故關道中

曉望榆關道肩輿坐未安
石墻多五色山徑忽千盤
松栢何年樹風塵舊日冠
半巖有蘭若試上白雲看

夜起

鼓柝清溪夜張帆待曉風
月中雞唱早天下犬聲同
暫住能留跡重來欲作翁
年華等流水回首語篙工

偶書二首

紫閣金闈吏穠桃郁李年
鳴鐘朝進食撤幄晝分筵
禍淺方深念時危未穩眠
裂冠如可忍寒暖付青天

其二

籠鳥曾矜籠闌花大逞姿
不因風雨夕那識艷陽時
萬卷將焉用扁舟尚可為
從今持史論應悔過崇卑

過清流橋北望

江國春多雨偶晴
圖畫開竹邊朱戶
啟花下美人來高

柳藏歌榭新鶯過吹臺近郊山更好蒼紫競崔嵬

晚坐

春色晚何在綠楊來數鴉影單猶作客夢好轉思家風
雨牀頭劍筌歌上苑花百年空健興惆悵日西斜

午坐

松韻灑寒髮清風銷積懷似難芟惡草無可障狂霾湖
海書頻滯山林願未諧知音不相待明月滿秦淮

秋日寄孟賢

秋聲驚短鬢忽忽過中元荷冷紅初褪林幽綠尚繁歸
心梁上燕客夢檻中猿不得張公子同來倒玉尊

宮詞

水殿荷風軟雲車草露新簾垂三峽雨香散六宮春青
雀黃龍舳朱衣畫袴人君王渾未厭歌吹已經旬

冬夜

夜坐無他事危居擁布袍斷編繙竹簡殘火熬松膏寒
暑雙車較生涯一羽毛涓埃渾未報素食愧吾曹

南莊書事

罷讀離騷賦悠然解獨醒
苔痕石上綠山色雨餘青
鵠立懷東觀鵬搏快北溟
殘鶯猶有意閒向柳邊聽

送趙鴻臚省兄

春草舊多情西風別恨生
高吟動池水清夢落江城
密線秋辭母崇岡曉望兄
鵬飛聊一息回首又雲程

送人

彩鷁乘風順名山過幾州
地形多北共天漢自西流
冠

履三千客瓊瑤十二樓
憶歸江海上應迷太平謳

移居長安門西安福巷

誰言廣陌好陋巷亦清幽
夜月春長滿晴雲書不收
宮中聞報漏門外度鳴騶
時復乘間興憑軒望五樓

道院

山中逢道士尊酒坐逍遙
草色連天綠雲香入幔
飄古潭龍夜語紫府鶴
晨朝應有飛仙侶倚樓吹玉簫

送別

我送霜臺使還歌白雪篇微名曾附驥竒骨自飛鳶夢
切雲霄上情忘水石邊臨風舒一嘯驚斷夕陽蟬

喜晴

幾日多風雨新晴乍可憐青山當屋角白鳥到花前掃
榻祛塵夢揮毫著短篇不須登漢閣有思欲凌烟

早朝二首

南風霏白露筦簟覺微涵宮漏猶傳五鄰雞已報三冠
從燈下正筆憶殿頭簪跨馬看城闕彤雲曉正酣

其二

散步瑤臺側東方尚渺茫御溝驚珮落宮霧著衣涼上
將金裝甲臺臣皂作囊景陽鍾未盡天語徹簷廊

燈花

誰道春光薄寒燈亦放花粟金裝寶樹文火伏丹砂千
里長為客三年不見家明朝有鄉信遙寄自天涯

開戶見殘月

開戶見殘月雕弓已下絃蛾眉窺淺水玉玦在青天近

寺聞清磬趨朝握短鞭不因鐘鼓急春曉正高眠

代夏先生題風木卷

西風吹拱木哽咽不成音樹古疑翻海人亡莫問琴淚
明原畔草魂黑雨中林日暮啼鴉急應憐孝子心

恭承誥封母趙為恭人進四品秩從家君貴也

喜而有作二首

乳烏思反哺荏苒一春無聖主推人子重封視大夫黃
金新束帶翠羽舊明珠未得承顏色徘徊立送途

其二

吾翁推憲法二十五年來直矢何曾曲高槐每自栽
兒曹思養色家國愧非才徒藉君王寵殷勤效老萊

冬至前二日赴朝天宮習儀

罷朝還走馬紫府亦丹墀地擁神仙跡人諳博士儀
角聲鳴夜月旗影掛朝曦莫辨黃鐘律寒灰已自知

西山

莫道山行樂山行愁更深擾龍僧坐鉢飛燕女橫金酒

著莓苔醉情熏草樹陰夕陽人語靜無處覓巢禽

長門怨

閉妾深宮裏宮門知幾重君恩如白日妾命自寒蛩月
落銀河澹天高玉露濃一般秋枕上聽得景陽鐘

秋夜

徙倚西風外秋聲滿鳳池何堪砧杵夜又在月明時病
葉辭柯響寒桐轉漏遲起看三尺劍悲壯兩難持

午夢

枕上行千里危樓望欲登
有時生兩翼飛到最高層
相隨園蝶悠悠訪寺僧
白雲看未了鶯語落青綾

秋思

白露籬間響殘螢是處流
朝朝上樓望日日使人愁
未遇梅花使空題蕉葉
秋殷勤報明月為我照西州

過山寺

百里見高峯山僧出寺逢
老松棲倦鶴幽靄度疎鐘
野澗饒風露巖深無夏冬
不知天已暮歸騎尚從容

送葉守

紫衣高蓋客誰復歎升沉萬里圖南翼平生拱北心
岐看八頌牛角遇知音他日簷廊上憑君作傳霖

西湖

城中稀暇日取適過林泉古寺排金榜離宮枕玉泉
折花聊映醉藉草亦成眠不學王孫嘔平心過百年

雙鴈傷翮育于庭中有感

自是排雲侶秋聲被網羅耦行猶作字長恨不成歌
北

望燕山月南思楚水波忽驚樓外影愁絕定如何

遊北寺亭上人後園

偶為尋詩出穠華觸眼新鳥歌行酒地花覆倚闌人風
籟渾無譜蟲書太逼真絕勝絃管夜紅袖舞香塵

城北

悵望城東北遠風增客愁生涯自流水人世本虛舟淚
向清時墮身當未老投誰能齊萬物長嘯憶莊周

哭貴閑女

何處能忘爾紗牕睡起遲古詩吟絕句小學誦題辭竹
馬朝隨伴糒笙手自吹有時端坐久狼籍畫雙眉

過丘頭寺故韓師院

古寺高僧去荒林但鳥歸鐘浮石潭月苔滿畫廊衣世
事驚春夢西風冷宦機坐看秋葉下惆悵昔人非

西港

高城舒一望明月下銀沙草閣平臨野溪流半繞槎樹
嚴秋尚茂蘭靜晚宜花不為尋真隱誰能卧紫霞

風中花

春花有殊色何事逐風流欲墮還依水頻飛不過樓託
枝憐命薄傾國使人愁願落簾櫳裏遺香尚及秋

園中

思君不可見三月正花飛楊柳垂金縷新苔勝舞衣鳥
來枝上語人自水邊歸盡日西南望空山但落暉

題都下主人壁

久出易春衣田園苦未歸興同花漫發身與燕俱飛古

劍雙明雪殘編幾絕韋金張雖可屬意不在光輝

東昌荅鄭侍御

勞君相問訊別意正茫茫魯國風何古吳山路更長
平舟去穩春暖鴈飛忙安得乘驄使追隨達建康

同陳宗之諸同年飲雞鳴山憑虛閣時羅太常
景鳴作倡二首

細雨緣山到清風待客來閣凌霄漢起門傍斗牛開雲
樹千家錦豪華六代才遺蹤不可問今古一銜杯

其二

二月到金陵秋山始一行人間無此地坐上得清卿痛
飲平生侶高樓萬古情蓬萊在何處縹緲暮聞笙

詠御溝紅葉

宮樹悴清霜泉聲落建章更無紅葉字猶是碧波光
肅秋將老人寒影太長東流和宿恨黯慘度年芳

得白宗伯先生書

北鴈正南翔書來自帝鄉人同秋色老情比道塗長禮

樂歸宗伯文章憶大方江湖無限意
佇幾斜陽

秋夜

曲檻散沉思高齋瞻夜雲
人聞河漢語天示斗星文
有恨能銷骨無詩可贈君
溪風與巖露悲哽若為分

雨後奉憶家兄

小雪還逢雨晴牕漸覺寒
南來風土異北寄鴈魚難
晚稻垂霜穗殘荷捧露盤
塞門今夜月禁冷立危欄

秋興

今年秋令早白露已霏霏巢久燕將別草寒螢漸稀多情惜亭柳未老定漁磯更與江湖伴收荷為製衣

熊峯集卷三